




Córas Faisnéise Schengen: ag cur leis an tslándáil agus le bainistiú teorainneacha san Eoraip

CÓRAS FAISNÉISE SCHENGEN

(SIS)



Caith súil ar an ngrafaic faisnéise chun tuilleadh a fhoghlaim

Tá Córas Faisnéise Schengen á neartú chun sábháilteacht na nEorpach a chur chun cinn. Caith súil ar na grafaicí faisnéise chun tuilleadh a fhoghlaim faoi na hathruithe atá ar na bacáin.

An 24 Deireadh Fómhair, thug feisirí Eorpacha a gceadú le rialacha nua chun bainistíocht teorainneacha seachtracha an Aontais a fheabhsú agus sábháilteacht inmheánach thíortha na hEorpa a chaomhnú.

Leis na bearta i dtaca le [Córas Faisnéise Schengen](#) (SIS) a neartú, táthar ag iarraidh an fód a sheasamh i gcoinne na sceimhlitheoireachta, na coiriúlachta trasteorann agus na himirce neamhrialta. Is bunachar eolais láraithe ar mhórsála é [Córas Faisnéise Schengen](#) a thacaíonn le rialú na teorainneacha seachtracha agus le comhar um fhorfheidhmiú an dlí.

Le blianta beaga anuas, tá teorainneacha seachtracha an Aontais Eorpaigh tar éis a bheith faoi bhrú, agus tá [roinnt tíortha](#) tar éis rialú teorainneacha inmheánacha a chur i bhfeidhm arís mar gheall ar [ionsaithe sceimhlitheoireachta](#) san Eoraip agus [an ngéarchéim imirce ó 2015](#).

D'fhonn a chinntiú nach ndéantar dochar do [limistéar Schengen](#), agus chun teorainneacha seachtracha an Aontais a chosaint, d'fhoilsigh an Coimisiún Eorpach roinnt moltaí reachtacha i Nollaig 2016 chun athbreithniú a dhéanamh ar chreatlach dhlíthiúil SIS.

Ag labhairt dó roimh an vóta iomlánach an 24 Deireadh Fómhair, dúirt an feisire [Carlos Coelho](#): “Fanfaidh Córas Faisnéise Schengen mar an mbunachar eolais is mó a bhaintear úsáid as agus is fearr a chuirtear i bhfeidhm i réimse na saoirse, na slándála agus an cheartais.” Chuir an feisire Portaingéalach de chuid Pháirtí an Phobail Eorpaigh in iúl go gcuirfidh an córas le slándáil na nEorpach freisin.

CÉARD IS CÓRAS FAISNÉISE SCHENGEN ANN?*

FOLÁIRIMH

✓ I bhfeidhm cheana féin + Gnéithe nua

- ✓ Diúltú do náisiúnaigh neamh-AE iontráil nó fanacht
- ✓ Daoine atá ag teastáil ó na húdaráis
- ✓ Daoine atá ar iarraidh
- ✓ Daoine atá á n-iarraidh chun cabhrú le próiseas breithiúnach
- ✓ Daoine agus earraí a bhfuiltear ag iarraidh seiceálacha discrédieacha nó sainiúla a dhéanamh orthu
- ✓ Earraí le gabháil nó le húsáid mar fhianaise i nós imeachta dlíthiúil

- + Foláirimh ar náisiúnaigh neamh-AE atá faoi réir cinneadh um fhilleadh
- + Foláirimh maidir le daoine a bhfuiltear sa tóir orthu, chun daoine a shainithint atá faoi amhras maidir le coireanna tromchúiseacha nó cionta sceimhlitheoireachta
- + Foláirimh choisctheacha i gcomhair leanas agus daoine leochailleacha atá i mbaol fuadaigh
- + Foláirimh a eisítear chun críche seiceálacha fiosrúcháin

CINEÁLACHA SONRAÍ

- ✓ Sonraí a bheadh cabhrach chun daoine nó earraí atá faoi réir foláirimh a shainithint, lena n-áirítear grianghraif agus méarloirg má tá siad ar fáil
- ✓ Naisc idir foláirimh éagsúla (mar shampla foláirimh maidir le duine nó feithicil)

- + Méadú ar úsáid as sonraí bithmhéadracha méarloirg, bosloirg, íomhánna aghaidhe mar shampla
- + Próifíl DNA chun daoine atá ar iarraidh a shainithint nuair nach mbíonn sonraí méarloirg, grianghraif, nó íomhá den aghaidh ar fáil don duine sin

ÚDARÁIS A BHFUIL TEACHT ACU AR AN gCÓRAS

- ✓ Údaráis rialuithe teorainn náisiúnta
- ✓ Údaráis phóilíneachta
- ✓ Údaráis chustaim
- ✓ Údaráis bhreithiúnacha
- ✓ Údaráis víosa agus inimirce
- ✓ Údaráis chláráithe feithicilí
- ✓ Europol agus Eurojust

- + Údaráis chláráithe bháid agus aerárthaigh
- + Beidh rochtain ag Europol ar na foláirimh ar fad sa chóras
- + Beidh teacht ag foirne atá ag obair i gcreatlach rialacháin na Gníomhaireachta Eorpaí um an nGarda Teorann agus Garda Cóna ar chatagóirí foláirimh a bhaineann lena mandáid

*SIS: Córas Faisnéise Schengen

Foinsí: Parlaimint na hEorpa, An Coimisiún Eorpach



europarl.eu

Caith súil ar an ngrafaic faisnéise chun tuilleadh a fhoghlaim

Chun dul i ngleic leis an imirce neamhrialta, cuirfear borradh faoi mhalartú faisnéise agus áireofar foláirimh maidir le náisiúnaigh neamh-AE atá faoi réir cinneadh fillte. Dúirt an feisire [Jeroen Lenaers](#): “I láthair na huair, ní mhalartaíonn na ballstáit faisnéis maidir le cinní fillte i gcás náisiúnach neamh-AE. Mar gheall ar an easpa malartaithe faisnéise seo, bíonn an

fhéidearthacht ann go seachnódh náisiúnach tríú tír an oibleagáid fhillte atá orthu agus go rachadh sé nó sí go ballstát eile.” I dteannta Carlos Coelho, chuir an tUasal Lenaers (Páirtí an Phobail Eorpaigh, an Ísiltír) tuarascáil na Parlaiminte maidir le Córas Faisnéise Schengen le chéile.

Leis na moltaí nua, beidh ar údaráis náisiúnta sonraí faoi chionta sceimhlitheoireachta a roinnt leis na ballstáit eile agus faisnéis a mhalartú freisin. Tabharfar isteach foláirimh choisctheacha maidir le páistí atá i mbaol (foréigean, pósadh éigeantais, nó fuadach arna dhéanamh ag tuismitheoir, cuir i gcás) chomh maith le foláirimh chun coirpigh a shainathint. Méadófar freisin an úsáid as sonraí bithmhéadracha, ach neartófar rialacha cosanta sonraí.

Bunaíodh Córas Faisnéise Schengen siar in 1990 nuair a cuireadh deireadh le rialuithe ag teorainneacha inmheánacha laistigh de limistéar Schengen. Glacadh leis an gcóras reatha (SIS II) sa bhliain 2006 agus tháinig sé i bhfeidhm in 2013. 30 tír san iomlán atá páirteach i gCóras Faisnéise Schengen. Caith súil ar na grafaicí faisnéise chun tuilleadh a fhoghlaim.

Tháinig caibidleoirí na Parlaiminte agus na Comhairle ar [chomhaontú](#) maidir leis na bearta nua seo an 20 Meitheamh 2018, agus cuireadh chun vóta iad le linn an tseisiúin iomlánaigh an 24 Deireadh Fómhair. Tar éis d'fheisirí Eorpacha iad a cheadú, beidh ceadú na Comhairle ag teastáil freisin sular féidir leis na bearta chun Córas Faisnéise Schengen a neartú teacht i bhfeidhm.

Tuilleadh faisnéise

[Vóta iomlánach \(24 Deireadh Fómhair 2018\)](#)

[Vóta an choiste um shaoirsí sibhialta \(20 Meitheamh 2018\)](#)

[Comhaontú leis an gComhairle maidir le Córas Faisnéise Schengen \(12 Meitheamh 2018\)](#)

[An traein reachtach](#)